

LA GNESPULE MALMADURE

Disinlu daurman: l'autonomie regionâl in Italie e larà strucje.

La plèe che lis robis a van cjapant a Rome e jè clare: lis fuarcis contrariis si slargjn, a cjapin pît sinpri plui. Dut un grant dafâ, di ogni bande, par fâj capî al public ce pericol spaventôs che sares l'Italie metude a pâr cu lis nazions modernis tun ordenament di libertât e di responsabilitât.

Autonomiis? Sêso maz! Indulà vadie a finîle la paronance des centrâls indulà la direzion dai afârs plui grues, la rendite des clientelis, des camorutis, l'inperi de burocrazie?

E alore fûr in prucission cun duc' i spaventapassaris: l'unitât nazionâl prin di dut, par chêi che crodin tal silabari dal Risorgjment; lis riformis agrariis e socjâls, par chêi che son entrâz te glesie di Marx; il pericol sclâf o todesc o francês par chêi ch'a stan dilunc-fur dai cunfins... E mai un ch'al sei bon di tirà fûr un sôl esenpli di un stât ordenat autonomisticamentri - dal inperi roman ai diviars stâz unîz di vuè -, ch'al sedi lât a remengo par colpe des autonomiis; mai un ch'al slungj il voli di là dai cunfins di cheste Italie par rindisi cont des veris condizions pulitichis di chês pocjs nazions ch'a mantegnin ancjmò un guviâr acentrat.

Ma e jè clare che vinçaran la partide. Pitost di molâ, i gramolons di ogni fate e scjadenaressin une vuere civîl: e denant la fantasie di une vuere e molaran cheâtris ...

Cussì l'Italie, vitime seculâr de retorighe, e tirarà indenant mantignint la camore e la massepassudèrie dai plui svelz, e mostrand a dut il mont cetant malmadure che jè la so int par une forme di vite civîl.

E i furlans? Une des dôs: o che si risolvin a unîsi, a alçâ la vôs e gjavâsi dal distin di chês atris regjons, domandant un tratament particulâr che salacôr al vignares, o che il centro, scjarterît di cheste sflameade di furlanetât, al cjatarâ la fate di scancelâ dal dut la filusumie de nestre int, de nestre lenghe, des nestris tradizions.

(tirât fûr de «Patrie dal Friûl» dal 23 di març dal 1947)